

Na osnovu člana 16. stav 1. Zakona o Vladi Zeničko-dobojskog kantona ("Službene novine Zeničko-dobojskog kantona", broj 16/00 i 7/10.), člana 32. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije Bosne i Hercegovine", broj 39/03 i 43/10.), Vlada Zeničko-dobojskog kantona, na prijedlog Kantonalne uprave civilne zaštite, na 13. sjednici, održanoj 19.05.2011.godine, d o n o s i,

UREDBU O FORMIRANJU KANTONALNOG ŠTABA CIVILNE ZAŠTITE („Službene novine Zeničko-dobojskog kantona“ broj: 12/04, 5/08 i 7/11)

I.OSNOVNE ODREDBE

Član 1.

Ovom uredbom osniva se Kantonalni štab civilne zaštite (u daljem tekstu: Kantonalni štab) kao stručno-operativno tijelo Zeničko-dobojskog kantona (u daljem tekstu: Kantona) za rukovođenje akcijama zaštite i spašavanja ljudi i materijalnih dobara od prirodnih i drugih nesreća, uređuje njegov djelokrug i način rada, unutrašnja organizacija, popuna, finansiranje, opremanje, obučavanje i osposobljavanje i druga pitanja od značaja za organizaciju i rad Kantonalnog štaba.

II.NADLEŽNOST KANTONALNOG ŠTABA I NAČIN OSTVARIVANJA FUNKCIJE

Član 2.

Kantonalni štab je stručno-operativni organ ovlašten za vršenje poslova koji su mu Zakonom o zaštiti i spašavanju ljudi i materijalnih dobara od prirodnih i drugih nesreća (u daljem tekstu: Zakon o zaštiti i spašavanju), i članom 84. i 88. Zakona od požara i vatrogastvu ("Službene novine Zeničko-dobojskog kantona", broj: 5/11), stavljeni u nadležnost.

U vršenju poslova iz svoje nadležnosti Kantonalni štab aktivira se radi rukovođenja akcijama zaštite i spašavanja, , onda kada Vlada Zeničkodobojskog kantona proglasi nastanak prirodne ili druge nesreće u Kantonu i stalno funkcionira, dok Vlada Kantona proglasi prestanak stanja prirodne ili druge nesreće, a izuzetno može se aktivirati i u slučaju kada prijete neposredna opasnost od nastanka prirodne ili druge nesreće u cilju preduzimanja mjera na sprečavanju nastanka te opasnosti ili nesreće ili ublažavanja njenog djelovanja i funkcionira, dok takva opasnost postoji, ili ako Vlada Kantona odluči da Kantonalni štab nastavi djelovati dok se ne otkloni opasnost, odnosno nesreća bez proglašavanja tog stanja.

U uslovima iz stava 2. ovog člana, Kantonalni štab ovlašten je da naređuje upotrebu i sredstva zaštite i spašavanja koje pripadaju Kantonu, odnosno snaga i sredstva organa uprave i upravnih organizacija Kantona, kao i snaga i sredstva zaštite i spašavanja općina i njenih službi za upravu, kao i pravnih lica sa područja Kantona koja nisu pogođena prirodnom ili drugom nesrećom i provođenje mjera zaštite i spašavanja koje mogu doprinijeti sprečavanju nastanka opasnosti ili nesreće ili ublažavanje njenog

djelovanja, kao i mjere, postupke i zadatke koji su u funkciji spašavanja, zaštite i zbrinjavanja ljudi i materijalnih dobara ugroženih tom opasnošću, odnosno nesrećom.

Ako obim prirodne ili druge nesreće prevazilazi mogućnosti snaga i sredstava Kantona da efikasno izvrše spašavanje i zbrinjavanje ugroženih ljudi i materijalnih dobara, u tom slučaju, Kantonalni štab podnosi zahtjev Federalnom štabu za angažiranje snaga i sredstava zaštite i spašavanja Federacije BiH.

U periodu kada ne postoje prirodne ili druge nesreće Kantonalni Štab svoje funkcije ostvaruje povremeno, prema potrebi i to onda kada razmatra stanje priprema, organizovanost, opremljenost i osposobljenost za zaštitu i spašavanje svih nosilaca zaštite i spašavanja na području Kantona i predlaže mjere za dogradnju, sistema zaštite i spašavanja i kada djeluje preventivno, u cilju sprečavanja nastajanja prirodne ili druge nesreće i učestvuje u vježbama i drugim vidovima obučavanja i osposobljavanja.

Član 2a.

U rukovođenju akcijama zaštite i spašavanja Kantonalni štab vrši slijedeće poslove:

1. odlučuje o upotrebi snaga i sredstava civilne zaštite na zaštiti i spašavanju ugroženih i nastradalih ljudi i materijalnih dobara i te snage raspoređuje na ona područja koja su ugrožena;
2. naređuje provođenje odgovarajućih mjera zaštite i spašavanja i određuje snage i sredstva koje će provoditi te mjere;
3. usmjerava, koordinira i rukovodi akcijama zaštite i spašavanja svih učesnika angažiranih na zaštiti i spašavanju na svom području;
4. naređuje općinskim štabovima civilne zaštite, štabovima civilne zaštite pravnih lica u kojima su ti štabovi osnovani i službama zaštite i spašavanja koje formira Vlada Kantona da učestvuju u poduzimanju mjera i aktivnosti na zaštiti i spašavanju na određenom području;
5. naređuje angažiranje snaga i sredstava civilne zaštite s područja jedne općine na ugroženo područje druge općine na području Kantona;
6. izvršava naredbe upućene od Federalnog štaba civilne zaštite, na preduzimanju mjera i aktivnosti na zaštiti i spašavanju;
7. rješava sva pitanja koja se u toku provođenja aktivnosti na zaštiti i spašavanju pojave u vezi sa angažiranjem snaga i sredstava civilne zaštite i provođenja mjera zaštite i spašavanja i samozaštite građana.

Član 2b.

Pored poslova rukovođenja akcijama zaštite i spašavanja Kantonalni štab vrši i slijedeće poslove:

1. predlaže proglašenje stanja prirodne i druge nesreće Vladi Kantona,
2. predlaže Vladi Kantona mjere za prevazilaženje stanja nastalih usljed prirodnih ili druge nesreće,
3. razmatra materijale i informacije iz oblasti zaštite i spašavanja koje priprema Kantonalna uprava nadležna kantonalna ministarstva i drugi kantonalni organi uprave, u oblasti zaštite i spašavanja,

4. podnosi godišnji izvještaj o radu Vladi Kantona,
5. donosi godišnji program aktivnosti na provođenju vlastitih priprema za uspješno vršenje operativne funkcije iz svoje nadležnosti (pripreme, obuka i osposobljavanje),
6. donosi odluku o visini i uslovima za naknadu članovima štaba za rad u štabu iz sredstava koja su osigurana za rad štaba CZ,
7. daje mišljenje na prijedlog Godišnjeg Plana korištenja sredstava posebne naknade za zaštitu i spašavanje,
8. daje mišljenje na prijedlog Procjene ugroženosti od prirodnih i drugih nesreća Kantona i
9. obavlja i druge poslove iz svoje nadležnosti.

Član 2c.

Pravilnikom o načinu rada i funkcionisanju štabova i povjerenika civilne zaštite ("Službene novine Federacije BiH", broj: 77/06 i 5/07) regulirana su i druga pitanja koja su stavljena u nadležnost Kantonalnog štaba, u skladu sa članom 112. Zakona o zaštiti i spašavanju.

III. ORGANIZACIJA I SASTAV KANTONALNOG ŠTABA

Član 3.

Kantonalni štab čine Komandant, načelnik i 11 članova.

Član 4.

Komandant Kantonalnog štaba je po položaju ministar Ministarstva za prostorno uređenje, promet i komunikacije i zaštitu okoline.

Član 5.

Direktor Kantonalne uprave civilne zaštite (u daljem tekstu: Kantonalne uprave) po položaju je načelnik Kantonalnog štaba.

Član 6.

Sekretar Crvenog krsta Kantona kao i državni službenik za informisanje u Uredu Premijera, Zeničko-dobojskog kantona su po funkciji članovi Kantonalnog štaba

Član 7.

Članovi Kantonalnog štaba iz kantonalnih ministarstava i Kantonalne uprave i drugih organa su:

1. rukovodeći državni službenik iz Ministarstva unutrašnjih poslova Kantona,
2. rukovodeći državni službenik iz Ministarstva zdravstva Kantona,
3. rukovodeći državni službenik iz Ministarstva za poljoprivredu, šumarstvo i vodoprivredu Kantona,
4. rukovodeći državni službenik iz Ministarstva za prostorno uređenje, promet i komunikacije i zaštitu okoline Kantona,
5. rukovodeći državni službenik iz Ministarstva za privredu Kantona,

6. rukovodeći državni službenik iz Ministarstva za rad, socijalnu politiku i izbjeglice Kantona.

Ostala tri člana Kantonalnog štaba predlaže direktor Kantonalne uprave iz reda državnih službenika koji obavljaju poslove preventivne i operativne prirode, koje pripremaju i provode ministarstva i druga tijela uprave Kantona u oblasti provođenja mjera zaštite i spašavanja koje su utvrđene u procjeni ugroženosti Kantona.

Član 8.

Komandanta, načelnika i članove Kantonalnog štaba postavlja i razrješava Vlada Zeničko-dobojskog kantona, na prijedlog Direktora Kantonalne uprave koji je usaglašen sa rukovodiocima kantonalnih organa iz člana 7. ove Uredbe. Kantonalni štab vrši poslove iz svoje nadležnosti samostalno i za svoj rad odgovara Vladi Kantona.

Član 9.

U izvršavanju složenijih zadataka zaštite i spašavanja Kantonalni štab može angažovati i druge službenike iz kantonalnih organa uprave i eksperte na profesionalnom radu u naučnim ustanovama i drugim pravnim licima.

Član 10.

Sjednice Kantonalnog štaba saziva i njima predsjedava Komandant Kantonalnog štaba. U slučaju da je Komandant spriječen da vrši svoju funkciju sjednice Kantonalnog štaba saziva i njima predsjedava načelnik Kantonalnog štaba. Kantonalni štab će donijeti poslovnik o svome radu.

Član 11.

Komandant štaba ima pečat koji se izdaje u skladu sa Zakonom o pečatu Zeničko-dobojskog kantona („Službene novine Bosne i Hercegovine“, broj 7/96, „Službene novine Zeničko-dobojskog kantona“, broj 11/97).

Član 12.

Sjedište Kantonalnog štaba je u Zenici, a sjednice se održavaju u mjestu određenom u poslovniku o radu Kantonalnog štaba.

IV STRUČNA SLUŽBA KANTONALNOG ŠTABA

Član 13.

Funkciju stručne službe Kantonalnog štaba vrši Kantonalna uprava.

U vršenju poslova u funkciji stručne službe Kantonalna uprava obavlja stručne, administrativne, tehničke i druge poslove neophodne za rad Kantonalnog štaba, što se bliže utvrđuje Pravilnikom o unutrašnjoj organizaciji Kantonalne uprave.

Radi ostvarivanja operativne funkcije rukovođenja akcijama zaštite i spašavanja ljudi i materijalnih dobara na području koje je pogođeno, odnosno zahvaćeno prirodnom ili drugom nesrećom, aktiviranje Kantonalnog štaba vrši Kantonalna uprava.

V. OPREMANJE I FINANSIRANJE KANTONALNOG ŠTABA

Član 14.

Kantonalni štab se oprema odgovarajućom opremom i materijalno-tehničkim sredstvima koja su neophodna za ličnu zaštitu članova štaba i za izvršavanje zadataka iz njegove nadležnosti.

Član 15.

Sredstva za finansiranje Kantonalnog štaba obezbjeđuju se u Budžetu Kantona, kao i sredstva iz člana 180. Zakona o zaštiti i spašavanju i donacija. Sredstva potrebna za rad kantonalnog štaba kao i finansijski plan utvrđuje Štab. Naredbodavac za finansijska sredstva je komandant kantonalnog štaba, a u slučaju njegove spriječenosti načelnik Štaba.

VI. PRIJELAZNE I ZAVRŠNE ODREDBE

Član 16.

Imenovanje komandanta, načelnika i članova Kantonalnog štaba izvršit će se najkasnije 15 dana od dana stupanja na snagu ove uredbe.

Član 17.

Danom stupanja na snagu ove Uredbe prestaje da važi Uredba o osnivanju kantonalnog štaba civilne zaštite Zeničko-dobojskog kantona broj: 02-02-11703/08 od 26.03.2008.godine.

Član 18.

Uredba stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj:02-02-14159/11
Datum, 19.05.2011.g.
Zenica

PREMIJER

mr.sci.Fikret Pljevljak, dipl.ing.